

«In team - Ina finamira»

Partida liberaldemocratica dal Grischun

DA GION NUTEGN STGIER / ANR

■ **Esser danovamain represchentada en il cussegl naziunal suenter ina assenza da quatter onns, quai è la clera finamira da la PLD da noss chantun. Restar per ils proxims quatter onns a Berna vul cusseglier dals chantuns Martin Schmid.** Il chastè «Brandis» a Maiavilla è stà il lieu per lantschar il cumbat electoral da la partida liberaldemocratica grischuna. L'interess per quella occurrenza è stà fitg grond ed ina raschun è bain era stada la visita da cusseglier federal *Johann Schneider-Ammann*. El saja vegnì gugent en igl Grischun, ina regiun nua ch'el passenta adina puspè ses temp liber, ha ditg il giast da Berna. Strusch ch'el saja en noss chantun sa chattia el en ina moda u l'atra dalunga pli liber. Cun sia preschientscha ha el fatg curaschi a la pld grischuna per l'expediziun da reconquistar il sez en il cussegl naziu-

nal, pers tar las elecziuns federalas 2011 als verdliberals. Johann Schneider-Ammann è lura er persvas che quai gartegia, grazia a las candidatas ed als candidats abels e serius, che la pld grischuna preschenta a votantas e votants.

«Noss sistem da scolaziun è da renum mundial»

En ses pled ha il minister d'economia lura er detg che per la Svizra saja da gronda impurtanza da salvar las cunvegns bilaterals cun l'Uniu europeica. Ultra da quai vegna la Svizra a rinforzar la convenziun da commerzi liber cun l'India, l'Indonesia, la Malaysia ed il Vietnam. Per sustegnair l'economia svizra vul Johann Schneider-Ammann er damain regulaziuns, leschas e perscripziuns, quai che saja gia dapi onns ina finamira da la pld. En l'avegnir saja dentant er da mantegnair il sistem da scolaziun e d'instrucziun professiunala, che



Las candidatas ed ils candidats da la pld grischuna per il cussegl naziunal cun il cusseglier federal, (davos da san.) Vera Stiffler, Maurizio Michael, Rudolf Kunz, Karin Niederberger, Hans Peter Michel e Christian Kasper. Davant da sanester Martin Schmid, Johann Schneider Ammann, Raphaela Hollinger, Urs Cadruvi, Angela Casanova e Michael Pfäffli.

FOTOS G. N. STGIER



Cusseglier dals chantuns Martin Schmid, cusseglier federal Johann Schneider-Ammann ed il president da la PLD grischuna Bruno Claus.

saja en Svizra sin in nivel fitg aut. «Noss sistem da scolaziun è da renum mundial e bleras naziuns èn bunamain envilgiusas e tschertgan schizunt da copiar quel», ha menziunà il cusseglier federal bernes.

Tut auter fiss inacceptabel

La pld grischuna ha ina clera finamira per las elecziuns naziunalas dals 18 d'october e quai è dad esser a partir da la nova perioda da legislatura danovamain represchentada en il cussegl naziunal. Il 2011, senza

ina collaziun da glistas, avevan ils liberals pers lur sez da *Tarzisius Caviezel* als verdliberals, che han tarmess lur candidat *Josias Gasser* a Berna en il cussegl naziunal. Tut auter che da reconquistar quel post en il cussegl naziunal saja bunamain inacceptabel, accentuescha *Bruno Claus*, il president da la pld grischuna. Grazia alla collaziun da glistas cun la pcd e la pbd, grazia a las candidatas ed als candidats cun in bun profil politic saja quai en tuts cas realistic da guadagnar enavos quest sez.

Grev da dir

Tge persuna che la pld vegnia a tarmetter a Berna en il cussegl naziunal, quai saja grev da dir. Las quatter dunnas ed ils sis umens da las glistas 1 ed 8 hajan tuts il potenzial per represchentar la pld da noss chantun en la chombra gronda dal parlament svizzer. «Nus essan in team cun ina finamira», punctuescha Bruno Claus, cun ina persvasiun dad avair success tar las elecziuns naziunalas en duas mais.